

Untan Bam

1930

In da koit'n Stub'm steht a Christbam
d'rauf finf kloane, vobogane Kirz'n,
a poor Äpfö und dicke Ingwerkrapfal.

Des wors!

Bei d'Fensta zoigt's eena.

Untan Bam liengan wollane Hondschui'
fir d'Mizz und fir'n Fronz.

„Stille Nocht...“ –

und de Kinaaug'n glonz'n!

1945

A Bamal – kloa und a wengl vowochs'n –
zwoa Kirz'nstummön und a Hondvoi dirrte Zwetschg'n.

Sunst nix!

Bei d'Fensta zoigt's no ollaweu eena.

Da Voda in da G'fonganschoft

irg'ndwo in Sibirien,

und d'Muida rotlos, vozweiföt.

„O du fröhliche...“ –

und de Kina g'frein si – trotzdem!

1960

A große Bam im worman Zimma,
Gloskug'ln und rote Kirz'n sogor
und Windringal und Schuklad'
und Schnopsflaschl'n fir d'Großen.

A Procht!

D'Fensta san dicht!

Und schau! A Pupp'n fir d'Mizzi

und a Hutschpferd fir'n Fronz.

„Es ist ein Reis...“ –

und de Kinaaug'n leicht'n!

1980

De Kirz'n san heia elektrisch,
da Schmuck gonz aus Glos, im blau'n Design,
kandierte Früchte“ zum Nosch'n:

Orangen, Feigen, Marakuja.

's is fost scho z'vü!

A Autorennboh 'kriagt da Franzi

und Mizzi a Gehpupp'n, de sogor red't!

„Alle Jahre wieda...“ –
und de Kina sog'n donksche!

2014

A Plastikbam steht in da Halle
vo dem karibischen Hotö.
Om heilig'n Ob'nd keman d'Urlauba vom Strond.
Se schau'n net amoi hi, wonn's zum Galadiner gengan.
Is des a Weihnachtsstimmung? –
„Silent Night...“ –
d'Kina zoig'n d'Kepf ee
und spü'n si mi'n Handy!

2030

Wer woaß's, wo bis durt hi no wird.

Advent 2014